

Չայնր անհատականությունն է:

Օսիպ Մանդելշտամ

Արձանագործ Արտո Չաքմաքչյանի սկիզբը վայել ու պատշաճ էր իր հետագա ընթացքին ու ճանապարհին: Նա սկսել է այնտեղից, «ուստի արժան է սկսանել»: Տարիներ շարունակ շրջել է Հայաստանում, ի մոտո ճանաչել հնավայրերն ու հնագույն կառույցները, որոնել, գտել մեր նախնի արձանագործության նմուշները: Երիտասարդ արվեստագետը հանգամանորեն ուսումնասիրում է հայ հին քանդակագործական արվեստի սկզբունքներն ու օրինաչափությունները, ջանալով թափանցել հին քարգործ վարպետների արվեստի գաղտնիքների մեջ: Հին վարպետների գործերում նա զարմանքով հայտնաբերում է ստեղծագործական մտածողության, կերպավորումի և պատկերման այնպիսի օրինաչափություններ, այնպիսի մոտեցումներ նյութին ու առարկային, որպիսիք քսաներորդ դարում միայն պետք է արմատավորվեին եվրոպական նշանավոր արվեստագետների գործերում իբրև միանգամայն նոր, արվեստում հեղաշրջող մտածողության դրսևորում, իբրև նորարարական-ավանգարդիստական մտածողության աննախադեպ արտահայտություն:

Ճիշտ ճանապարհը, ճիշտ ուղին արդեն գտնված էր: Երիտասարդ արվեստագետի հոյակապ ընթացքը սկիզբ առավ ու վայելչորեն շարունակվեց այդ ճանապարհով, հայ հնագույն արվեստի բարձր ավանդույթների պահպանման ու խորացման ճանապարհով: Հանրությանը ներկայացված իր առաջին իսկ գործերով նա մերժում է գորշ, պարտադրվող ճաշակը, կեղծ սկադեմիականի ու գռեհիկ նատուրալիզմի, բնության ու առարկայի անհոգի պատճենումի ու նմանակումի մտայնությունը, վճռականորեն հրաժարվում է կերպարի ու առարկայի հավասար-միահարթ մակերեսներով, թվում է՝ դասականորեն անթերի ու իդեալականացված պատկերումներից:

Արձանագործը նոր արտահայտչաձևեր է որոնում, որոնք իրեն՝ հեղինակին, ինչպես նաև դիտողին առարկայի մակերեսից պետք է տանեին դեպի առաջին հայացքից չերևացող խորքը, ներքին էությունը, ներաշխարհը:

Հազվադեպ է պատահում, որ արվեստագետը ասպարեզ մտնի միանգամայն հասուն, կատարյալ աշխատանքներով: Արտո Չաքմաքչյանի՝ 1960-ական թվականների գործերը արդի հայ քանդակագործության այլևս դասական նմուշներ են, նշանային-նշանավոր գործեր, որոնք կատարելապես իրենց մեջ ներառել, կերպավորել ու պահել են ժամանակի բնութագիրն ու նկարագիրը, իմաստն ու գույները: Իր կերտած քանդակները՝ հորինվածքներն ու դիմանկարները, գեղարվեստական բացառիկ ու մնայուն արժեքներ են և մեր արդի արվեստի իսկական հարստությունը. «Մոր դիմաքանդակը»՝ կարելի է ասել՝ հայ բոլոր մայրերի հավաքական կերպարը, «Առն Բաբաջանյանը»՝ մարդը, երաժիշտը, քաղաքացին, «Հարություն Կալենցը»՝ ղողանջող գունարվեստի կախարհը և մոգը, «Կոստան Զարյանը»՝ երկրներ և աստվածներ տեսած ու ճանաչած մարդը, որի ներաշխարհը, ինչպես դիմաքանդակն է ասում, լեցուն է ավելոծվող հրաշեկ լավայով...

Այդ տարիները մեր ազգային ինքնագիտակցության արթնացման և մեր ազգային ոգու վերելքի ժամանակներն էին: Ասպարեզ էին մտել տաղանդավոր և առանձնապես օժտված մի խումբ արվեստագետներ, որոնց վիճակված էր նոր խոսք ասել և նոր բարձունքների հասցնել հայ արվեստը: Նրանք բացառիկ տաղանդի և ամբողջական նկարագրի տեր գորեղ անհատականություններ էին և նրանցից մեկը, անշուշտ, Արտո Չաքմաքչյանն էր: Այդ տարիների նրա գրեթե բոլոր գործերը՝ այնքան խորհրդանշանական ու խորհրդավոր «Երեք մատը» (1965), այլախոհական հստակ շեշտվածությամբ «Ազատությունն» (1965) ու «Մտածողը» (1965), մյուսները, վկայում էին քանդակագործի անառարկելի տաղանդն ու արվեստի ուժը: Եվ, իհարկե, իր «Կոմիտասն» ու իր «Նարեկացին», մեր ժողովրդի ճակատագրի և էության մեծ մարմնացումները... Իր «Կոմիտասը» մեր ազգային ինքնության, մեր ինքնագիտակցումի վսեմ ու ոգեկան դրսևորումներից մեկն է, իր «Նարեկացին»՝ հայ

ստեղծագործական մտքի ու կարողության գովքը: Արվեստագետը դեպի այս խորհրդանիշ-կերպարները ընթացել էր երկար ու համառ որոնումների ու խորունկ իմաստավորումների ճանապարհով... Նույն այս տարիներին Արտո Չաքմաքչյանը ստեղծում է իր ժամանակակիցների՝ Հայաստանի հանրային, գրական ու մշակութային կյանքի գործիչների քանդակային ու գրաֆիկական դիմանկարների մի հոյակապ, անկրկնելի պատկերասրահ:

Հետո եկավ ուրիշ մի ժամանակ, երբ մարդու շուրջը հետզհետե խտացող-թանձրացող օդը կյանքը դարձնում է ավելի անձուկ, իրականությունը՝ ճնշիչ, կաշկանդող, անել... Վրա է հասնում ելքի ժամանակը... Քանի՜-քանիսին արտաքսեցին կայսրությունից, քանի՜-քանիսը իրենք հեռացան... Եվ մեծ տարագրի շնորհակալության խոսքը սրտում՝ «Երախտապարտ եմ, օ՛ իմ երկիր, քո հասցրած ցավի ու վերքերի համար», Արտո Չաքմաքչյանը 1975 թվականին գնում է հաստատվելու Կանադայում:

Կենսական նոր միջավայրում և ստեղծագործական նոր տարածության մեջ արվեստագետը շարունակում է ընթանալ խորացումների և ներքին բովանդակության հարստացման ճանապարհով, իրագործում է հանդուգն ու համարձակ մտահղացումներ, ավելի խոսուն և արտահայտիչ դարձնելով ձևաձավալների լեզուն, նվազագույնի հասցնելով թեմայի, նյութի այսպես կոչված «գրական-պատմողական» գիծը: Այս շրջանում ստեղծված իր գործերը հետզհետե դառնում են ավելի խորհրդանշանական ու կերպարային, արտահայտչամիջոցները՝ զուսպ, լակոնիկ, ընդհանրական, բայց՝ խոսուն ու իմաստալից («Վերջին դատավճիռը», 1979, «Մեկը և մյուսները», 1979, «Մեռնող զինվորը», 1983): Արձանագործը ինքնօրինակ մոտեցում ունի մեր դարի հանրությունների կազմակերպման ձևերին և էությանը («Ամբոխը և իր կուռքը» շարքը), միանգամայն անսպասելի լուծումներ է տալիս հին ու ծանոթ թեմաներին («Անառակ որդու վերադարձը», «Խաչելություն» շարքերը, «Ողբ», 2000): Արտո Չաքմաքչյանի արվեստը հետզհետե ձեռք է բերում նոր երանգներ, իր հորինվածքներում ու դիմաքանդակներում որոշակիորեն ընդգծվում են առարկաների,

տարածության, ժամանակի, առհասարակ իրականության փիլիսոփայական-մետաֆիզիկական ընկալումներն ու մեկնաբանությունները («Ժամանակի միջով», 1990, «Տարածության միջով», 1990, «Վտանգված վիճակ», 1998, «Ողբ», 2001): Կանադական կյանքի իր շրջանը հարուստ է անառարկելի հաջողություններով: Անհատական ցուցահանդեսներ է բացում Մոնրեալում, Տորոնտոյում, Փարիզում և այլուր, որոնք մեծ արձագանքներ են ունենում, մեծածավալ քանդակներ է տեղադրում զանազան քաղաքներում (չորս մետրանոց «Կոմիտասը» Դետրոյտում, նույն չափի «Վերածնունդը» Տորոնտոյում, գրեթե նույն չափի «Հույսը» Մոնրեալում և այլն), իր բնորդներն են դառնում համբավվոր մարդիկ՝ փիլիսոփաներ Լեշեկ Կոլակովսկին, Ալեն Մոնտեֆիորին, Ժան-Ֆրանսուա Լիոտարը, Չարլզ Թեյլորը, Ռեյմոնդ Կլիբանսկին և ուրիշներ, Մեծ Բրիտանիայի Արքայական ակադեմիայի պատվերով ստեղծում է Նոբելյան մրցանակի դափնեկիր բժիշկ Պետեր Մեդավարի քանդակը (1980), շահում է հայտնի դիրիժոր Վիլֆրիդ Պելետիեի արձանի համար հայտարարված մրցանքը (արձանը տեղադրվում է Մոնրեալի Արվեստների հրապարակում 1984-ին), Հայդելբերգի Գիտությունների ակադեմիայի համար ստեղծում է Հանս-Գեորգ Գադամերի կիսանդրին... Թվարկումը կարելի է երկար շարունակել: Մամուլը, արվեստաբանական միտքն ու միջավայրը միշտ բարձր են գնահատել Կանադայի Գեղարվեստների ակադեմիայի անդամ Արտո Չաքմաքչյանի արվեստն ու գործերը: Արվեստագետը տասնամյակների ընթացքում ստեղծել է նաև հոյակապ նկարչություն, իր տարածական-քանդակային մտածողությունը գծային ինքնօրինակ արտահայտչականության կերպարով խառնելով բարձրարվեստ գրաֆիկա: Արվեստագետը մշտապես ասելիք ունի, նա խոսում է, անկախ այն բանից՝ իրեն լսում են, թե չեն լսում: Նա խոսք է ասում, և իր արվեստը իր հստակ ու հաստատուն ձայնն է, որը տաղանդի ուժով բառը, խոսքը կարող է վերածել հանուն մարդկության, հանուն կյանքի մաքրության ու մարդկային արդարության արձակված հոգեկան կանչի ու հզոր աղաղակի («Ճիշտ», 1999): Եվ հանուն մարդու ասված այդ խոսքը, այդ զորեղ ճիշտ Արտո Չաքմաքչյանի արվեստի հիմնական խոսքն է, ասելիքը, բովանդակությունը:

Ամեն մի իրավ քանդակագործ երագում է հասնել իսկական վարպետության, մեծ արտահայտչականության, ուժի, թափի ու խորքի... Շատերն են ձգտում դրան, բայց դա տրվում է քչերին: Եվ արվեստների աստվածը արդարորեն ամեն մեկին տալիս է -տվել է իր ձիրքի ու շնորհքի, իր օժտվածության ու տաղանդի համեմատ:
Արտո Չաքմաքչյանին՝ առավել չափով...

Երվանդ ՏԵՐ-ԽԱՉԱՏՐՅԱՆ